

求是堂文集

求是堂駢體文卷二

涇 胡承珙 墨莊

平海紀略序

蓋聞百越素號陸梁五嶠昔稱塞上蠻荆不靖曾煩象舞
之師韶石空存詎識鳳儀之化然而諸黎踞洞尚易焚巢
羣獠盤山無難搜穴要未若長鯨跋浪短蜮含沙據島嶼
以逋逃乘風潮而出沒易漏吞舟之網幾摧強弩之鋒者
也故非令嚴於山才大如海胸有成竹目無全牛驅鯨必
除誓戢惡溪之梟跼不顧期收浪泊之功未有能迅掃
櫓槍全清甌脫廓二十年之妖氛毒霧恬四千里之駭浪

驚波如今日者矣伏惟宮保菊溪制府玉帛降精金提建
福風雲會於掌上兵甲貯於胸中香案初辭八州作督長
城是賴一障乘邊暨乎一輪之卿月更明五管之福星重
照固已迎細侯以萬馬之羣使君還我加隨會以三命之
服羣盜思奔矣公之來也拜井有靈如擲臬之皆赤賦詩
見志卽啖荔以輸丹公自山左移節兩粵默禱於趵突泉有應至粵有殺賊歸來啖荔支句
蓋澹臺濟江必飲老蛟之血代公仗劍定弭毒龍之灾而
乃海水皆飛羣妖邁迕陽冰不冶陰火潛然蓋是時郭學
顯擁黑山之衆張保標赤幟之雄而梁保者如水母目蝦
蟧蛄腹蟹踞東中之兩路遂聲勢之相依其西則麥有金

兄弟而吳知清李尚青附焉焦黎齧索罔懼天誅戮獠磨
牙至甘人肉於是恨海童之邀路鮮不痛心無如駭河伯
之望洋因之束手惟公智出九天目營八極上金城之奏
動合機宜厯石門之陜周知形勢畫地而習水戰取盤而
繪天山耀楊僕之旌旗樓船百尺經臨淮之號令壁壘一
新鶴膝犀渠民皆自衛魚梁蟹簞地盡周遮禁兵器於潢
池誰予蠻鐵斷雲帆於遼海不運吳鹽所以絕其覬覦窮
其接濟魚無濡沫將游釜底之魂鳥盡喁啾待繫籠中之
羽至於孫恩已死豈號水仙徐市不歸思爲島帥梁保旣
成蟲化張保尚肆鴟張斯時也赤舌燒城常驚飛牡黑丸

所吏競欲探囊公則益厲戎行盡祛羣議張彌天之網鸞
射潮之弓追勦於大嶼山前而稍疏豕突之防暫成兔脫
之勢然自是已足以亾賊魂而褫其魄矣旣而郭學顯則
舞天先至張保亦俟月思歸始則如黨項之願効前驅繼
則如回紇之力求一見人咸謂龍淵莫測虎穴難探無銀
衡鐵室之防不可以冒矢石無赤馬黃龍之備不可以涉
風波而公乃以膽包身將心置腹單車造張嬰之壘免胄
效葉公之裝開布大公宣揚

聖武此固不煩十盪十決已識我師之無前七縱七擒始
信南人之不反矣所以鄭石氏撤簪請罪幸寬徵側之誅

張保質子投誠卒踐子義之約公乃念馬人龍戶本易招
徠蠶蠱蛇妖必期殄盡爰是申防風後至之討窮飛廉可
走之區先期檄越南王勒兵境上使諸戎爲犄角假北犍
作疑兵夫然後伐鼓揚帆投醪誓衆釋蔡州之降卒用孟
獲之軍人犀炬都然龍工可往島人五百待築鯨鯢習流
三千皆成鵝鵲追及麥有金等擒渠萬里之沙獻捷雙溪
之港而李尚青吳知清肉袒先降檻車以待棄甲齊于熊
耳當蹊無復馬銜網已宏開轡惟獨絕崖尤兄弟肩髀橫
分子璋髑髏模糊一擲勇夫聞而股慄義士爲之快心從
此黨散黃巾蜂屯不見巢成赭土狐嘯皆空蜺妹魚姑共

訴生還之樂刀耕火種永爲不叛之民金甲春農呼賈琮而爲父銅鼓宵吼戴新息以如神捷聞

天子以爲贊淮西之役惟裴度與同成先零之功非充國不可紫泥降詔翠羽飄纓進方召以師保之尊許桓武以繼承之美巍尊龍勺以貺奇章寶帶金盤特加賀弼功綦懋矣寵綦隆矣此則不世之勲待人而建非常之事惟斷乃成較之焚樓名山斷藤號峽百戰拔盧循之柵三鼓奪儂氏之關豈不赫耀旂常同垂鐘鼎哉承珙鑾坡學步久仰儀型英蕩采風暫陪談笑猥蒙獎掖加以飾雕諷紀事之八章展平海之一紀白狼朱鷺恍鏡吹之聞音甲令庚

鈴勝燕然之勒石十洲澄鏡本無煩諭蜀之文萬里乘槎
竊願效平淮之雅

朱蘭坡小萬卷齋詩集序

原夫金絲引和必貴幼眇之音元黃錯采所恃麗密之體
非情動於中則八音皆浮響矣非質有其內則五色以久
淪矣物固有之文亦宜然故夫詩之興也哀樂泯於自然
喜怒匪由人事士衡著緣情之教彥和垂體性之篇陳王
擴宇於國風阮公受才於小雅江淹善恨乃義心苦調之
人平子工愁有惻隱古詩之意皆以因流溯源援條振藻
涂轍雖異滙歸則同焉今者標舉風流揆張慧業或搏摭
以眩博或跳盪以逞豪或闡緩以尚和或譎詭以肆巧幾
乎家藏鵲玉人握驪珠鏗鉤驚趙鞅之魂絢爛瞬安豐之

眼然而土夫木伯或少情根露蘼風榮無關性始有女之
舜英徒豔男子之樹蘭不芳眞宰弗存翮其反矣若吾友
蘭坡之詩其眞溫柔在誦悃悵切情察士多凌諄之思好
麗有殷勤之意者歟君學通五際才備九能早直承明之
廬屢游博望之苑固已四巡臚頌八采蜚聲窮廣內之青
編輯平臺之麗曲洎乎荷衣楚製蓴饌吳烹樂琴書以消
憂閱魚鳥以散慮則王微之宦情本淡沈警之素業自娛
固無不平之鳴亦非多窮之比人祇知君詩圭璋爲心煙
霞散囑嬈香山之廣大追玉局之清森而吾獨謂其深於
性情範諸風雅者則以君少遭孤露長切友于念羸負之

恩勤悲令原之急難鞠我拊我無忝於所生陟屺陟岡尚
慎於行役加以綢繆親故契闊友生伐木無鳥鳴之刺谷
風絕弃予之怨往往深衷內蘊古道外章櫟括倫紀之中
翱翔名教之地不啻一篇而三致意十事而九爲律焉以
故胚胎元氣藻鬯衿靈沈鬱澹雅之思芬芳悱惻之致欽
崎厯落之氣蒼涼悲壯之音旣積於中有來不已夫然後
幹之以風骨布之以葩華諧之以律呂標之以興會莫不
總制清夷自成馨逸此所以意匠司契心聲詣微境泯娛
憂感均頑豔寫逸少深情之帖遜此纏綿讀公叔崇厚之
論無其篤棐者也承琪手無慧珠腹若簪井才不逮於作

者心猶慕夫古人雖欲綜述風騷鑽研比興而未能聽遺
音於絃外抽妙緒於機先惟與君同朝十年相思永夕竹
柏之契證於清襟萱蘇之懷通於幽寐數贈答之篇章傾
耳已熟話平生之出處僕指能詳猥許心知發其目諭卮
言無當墮引聊先徒致美於探驪終有慚于窺豹爾

送閣學王介堂師予告歸里序

夫古人因萼菜而思歸爲苦筭而致仕吾知之矣或棲遲
失志或慷慨知幾虎嘯龍吟乎子歸田之作弋鴻釣鯉仲
生樂志之言雖趣協于今情而事殊于往跡然則懿量歸
老冲德懸車魏舒先行後言人不知其去位杜衍引年謝
事意豈竊夫高名此固非侈談泉石浪語烟霞所能狀北
海之高明慕香山之廣大者矣若吾師介堂先生殆所謂
國爵屏貴家人忘貧師止水于座隅引清風于琴上者與
先生族推共馬譽著優龍獨步擅于江東無雙來于日下
爲憐春近竟籍長安乘得風高旋登上第凡夫斟書東觀

眎草面清花磚鵲步之容蓮燭傳歸之寵誠足爲瀛洲之
故實閩苑之芳型已若夫椽爲手筆冰作頭銜黃道無歧
丹霄自峻照春坊之寶字草色承袍采秋實于家丞月明
飛蓋橐筆出螭頭之上屬車參豹尾之間五色絲綸樊仲
堪資補袞一編山海伯翳進佐司空其官閭之清要有如
此者至於龍光渥荷牡駕頻驅張秋士之羅冰壺朗映持
夜郎之節玉尺平量俯謝家之青山三年小住指皖江之
白水兩字深盟歲已過乎周星人猶占其似斗三千波浪
羣趨龍鯉之門八百孤寒並入參苓之籠豎乎

堯年復旦禹穴升禋名山視五嶽之封大夫備九能之選

其聲望之優隆有如此者若其抑抑自持躬躬如畏交無
洛蜀援不金張陸黷曉以禮處人王僧虔善能屈己韓皋
三世笏未授于僕人孔光一生樹不談夫溫室飮半柑於
席上醒不取嘗問幾馬於轅中數而後對以故水流不競
風靜無波焚香多默告之時放枕有酣眠之適其境況之
恬夷有如此者而且嶠松多節巖電爍人腸胃之文章映
日鬢須則瀟灑臨風善讀千文致心旌之不動能輕百步
識氣溥之常溫捉麈尾而說朝儀靡靡可聽作蠅頭而鈔
典籍厯厯不忘待漏趨公料量及於冠幘閉門卻掃居處
儼若神明其精神之明健有如此者此則輅存顯慶倍覺

馬骨三
卷二
渾堅殿歸靈光真堪式仰班彪入見宜著鹿皮之冠石麟
侍中將賜龍頭之杖人待庇于眉子朝未厭夫蕭卿而乃
端牘辭榮投簪引素喚回春夢賦就秋聲傳符止足之名
衣稱遂初之製苟非道腴自飫福慧俱兼陶宏景眼有方
瞳李鄴侯身多鐵骨烏能

清時納祿白首歸家銜樂聖之杯走和神之國如此也哉
且溧陽者固所稱烟水之名區神仙之窟宅者也金澗之
流泉可掬銅官之山色常青于焉烟蘿問徑鰕菜乘舟楊
石崔琴灘開八節局棊爐藥亭築三休愛綠野之羣羊點
茲芳草惜浮光之美鴨臥以輕萍故知息影廬中者視柳

宜坡爲拘俗舉頭天外者望班景倩如登仙矣乃者客非
今雨秩到古稀會洛社之耆英成江湖之野服臥許汜於
牀下善殖無心置文度於膝前貽安自足騎乘小駟看傀
儡之登場節度中秋命管絃而叫月承琪感深恩地愧甚
荒莊昔日明經幸免貽羞白蠟幾年得路祇緣依附青雲
送疏傳於東都手攀祖帳憶樂天於南國圖上屏風升堂
之路雖遙扶輿之情倍切附鶴飛而奏曲敢希爲受賞之
音託魴議以摛詞更願侍嘗珍之饌

送家崇垣大令之官江右序

夫鳥飛各天耿故巢之在念魚游異水瞻同隊而相思故望衡之交索居感其風雨撫塵之好壯游苦其參商何況桃李芳園竹林舊侶挹清芬於筆研交幽費于韋弦者乎君行矣似途千里乞休一句被過家上冢之榮慰朝門莫闕之望亦足樂也獨念予者拙於直近嬾與慢成宋株之守何時越射之儀不易閉門輦下無異空山檢歷牀頭始知久客與子契闊我勞如何猶憶曩時予甫成童君踰弱冠流連釣游之地跌宕文酒之場朔別晦期掎裳連襪百錢具饌供永夕之陶陶半解會心聽清談之靡靡新賞未

歇古懽更濃方謂來日尚多此樂可保而中更憂患婁經
合散不名一致所懷萬端予旣頊頊君尤俛俛當斯時也
君有安仁悼亡之戚乏士衡入洛之資飛蓬渺其隨風強
臺迫于難上游殊子孟敝車羸馬之容庶非伯通殘杯冷
炙之饌此之佗僚予能知之今者冶金不言研鐵已穴紅
綾甫噉墨綬旋膺筮得斗城勸餐升米亦復無助興豪轉
傷形役矣然而歲月澹其嗜欲紛華所以不移也風霜鍊
其筋骨盤錯所以不折也執獫搏虎旣自試于焦原害馬
亂羊當力除于巖邑足下緇塵未化白水堪盟出國門而
行李蕭條聽衙鼓而步趨溫雅視彼銀黃乍綰竹素全拋

牒訴裝其胸敲朴撾其慮鄧颺之躁將近鬼劉與之胼欲
汚人其相去爲何如耶抑子又有進者蒲鞭在手更求不
試之方擗冠冒頭當爲易掛之計苟其種杭足給彈琴自
和則蕭生可以抱關謝令何妨止酒不則匡廬之雲本無
心于出岫西江之水堪載送于歸艤山澤之游依然圖書
之樂不改予將與子激流而飲誅茅而居釣魚一雙買牛
十具潔毫足以供祭春稅足以代耕豈不進退裕如蕭灑
自得者哉作此早計笑子與之爲人好爲盡言恃惠子之
知我匪我調妄情在於斯言不能罄歌以繼之歌曰景風
扇物暑雨載途送子於野搔首踟躕湛湛江水歸墟惟海

人之善懷亦各有在一漚自足百年有期馬力之竭徒悅
人爲浮雲蕩搖邱陵如故悠悠風塵葆此貞素彭蠡之渚
實多智禽冰泮北翔遲爾好音

送朱壘陽明府之官山左序

今夫繁絃嘈囀不奪觥俞之聽蟠木輪囷不傷獲人之鬪
世之以風塵爲天械隨簿領而陸沉者其皆滑欲於俗思
溺心於躁進者乎若夫覲之理劇不廢嘯歌吳隱酌貪無
改圭潔大魚王龔之德小山張稷之游積草一庭蒔花百
里連袂而歌于薦飲醇而號建康希古振縷及今濡跡斯
爲得之庶有取耳壘陽二兄玉骨韞采繡輦振奇發藻下
帷之年蜚聲播篋之日苗川文學羣讓公孫洛陽秀才端
推賈誼往往五問並得一軍皆驚矣今者訶鹿鳴而來躍
龍門而上宴回綬綰遂學烹鱸詠罷霓裳應工製錦人咸

謂鷄聞未到鵲枳徒植恨楊意之不逢以韓愈爲可惜士各有志僕不謂然今夫江河之旁無沃畝不如鄭白之渠也松柏之下無殖草不如蔽芾之蔭也是以良吏之用過于勝兵劇邑之難甚于時宰試卜式以吏事褒卓茂以侯封有由然矣設令足下入金閨步玉岑排青瑣翔紫闥豈不能遷鶯索句掃葉簪書講經登七寶之牀隸事掣五花之簞而豎鱗淥水未免浮沉軒毳青天祇供腹背鏹齊驥駉難効執鼠之功筆如干將無益補履之用加以雲深夢冷日近居難破椽之屋打頭溼薪之烟眯目亦復味如雞肋寒甚牛衣韓文無救于五窮晏祿難周于三黨豈如盤

錯有用方圓可施宜鄭阿之風行蒲密之化圖形鄉社疏
姓屏風使人歎鮮于之賢安得百輩諸葛之量當作三公
也哉或又疑足下油素方齋銀黃遽綰解巾伊始讀律未
精恐不能催手如雷蕭符似火吏將慢于烏攫民不狎於
雞驅者此又葦笥之猥談非蒲鞭之良術也夫成王之諫
入官戒面牆於不學文侯之論始仕入晦室而徐明故漢
世諸郎每令出宰唐宗策第即使臨民豈必人人懷袁甫
之緇家家藏傅翮之譜而且威鳳一羽安用蒼鷹馴雉四
郊行致白雀方今

聖治載馳皇民道敦邊陲無枹鼓之驚郵驛禁厨傳之飾

穀人晝而絲人夜大絃溫而小絃清苟如劉方之不煩奚
必咸宣之無害足下第裁量金布祕飾竹冠鞭視後羊牧
去害馬劉超課賦令自署以投函子長訊囚但爲形而刻
木至於敝車羸馬共識清修斗酒隻鵝堪餉大府書不慮
其掣肘禮何靳於折腰夫然後張幕露初放衙星夕謝情
最勝山水方滋嵇性原疎魚鳥自近足下烟懷直上琴德
素優攫醪養和觸撓如志朱墨旣了發篋則素書依然鈐
拆不聞隱几而青山如在綠槐白水推敲潘令之詩紫駁
朱斑摩挲吳珣之器況復地連左輔官有東名鄭宏化毗
宜尹鄒魯王陽迴馭不歷邛崃足下捧檄怡顏築堂迎養

鮮無煩于封寄鳧不假以飛還

君以親老告近改發山東

赤子捐循都

成孝子濟南風景大似江南人生如此樂可知矣承琪天涯羈宦人海藏身感舊慕徒愛閒多病方期王翰共結日下之鄰卻送安成不識夢中之路聊贈鄙言於季重無煩改轍而行如頌清德於臨漳敬用濡豪以待

夢游弇山圖序

夢游弇山圖者馮子晉魚之所作也晉魚抗跡希古崇情振奇抱幽賞於金石覃湛思於竹素長卿慕義因緣睨柱之名仲慶好元周旋執戟之客顧獨於明弇州山人有深契焉於是摸暗中之沈謝不待吳音從異代之嚴楊行思蜀道偶沉鼻觀遂御尻輪聆鳴鳥之仙音望華胥之樂國列子華胥氏之前身恍惚曾到西湖清夜迷離似游天姥國在弇州之西羣仙高會方書新宮之銘異境中開儼入瑯嬛之館精神所感亮在斯乎夫蔡邕乃夙世之張衡蘇晉爲後來之王粲展案閒之軸名識鄒陽檢鄴中之書序求子建而且赤

衣鑿腹丹篆填胸石闕銘餘鏤管可贈禪靈泊處匹錦相
詒於傳有之吾聞其語矣晉魚專精旣篤通呂蒙嚙後之
經用志不粉識張敬寐中之路辨香所在敬爲南豐汗漫
之游放乎東海固可自成斐然歸諸盍各耳如其取法貴
上轉益多師則夫七子近乎標榜四部苦其紛綽綜輦悅
於遙年悔卮言之少作雖才不世出而學以年劭吾願晉
魚肆彼冥搜授茲秋駕根柢深厚更抽江令之花膏馥充
腴不拾鄭耶之唾則將引青藜而下照執丹漆而西行猶
龍可慕行且逢談老之人栩栩依然豈僅表齊莊之字

贈朱蘭坡五十初度序

夫盛季不再臨川感其逝波歧涂孔多旋軫爲之隕涕昔人所慨僕不謂然吾人生爲男子占榮期之一樂時當太平無張衡之四愁大隱足以容身微疴足以養性恆榦未化義望相與周旋夙根不昧煙雲關其懷抱鼃坎自足斗升無與人爭駒隙雖馳歲月已爲我有此僕之所以平情觀物頤志全生逍哀樂於中年安優游以卒歲者也而於足下則更有進焉足下節母之子也齒髮未燥形其不羈頭角已成致此有見卒能珥彤書操琢石流聲繪秋鐙課字之圖迎春水安流之舫尺波捕鯉馨夕膳以有餘寸草

扶翹侔晨葩而更潔此足樂者一也足下植根芳苑濯鱗
清流咳唾而珠玉隨風腸胃之文章映日故冊佚常居柱
下嚴終久在承明汪解積考皆爲儒官德林累年不出文
館爐烟兩裏巢痕九重緇塵未染其衣簿書不掛于眼此
足樂者又一也華族鼎貴高門戟列應氏有神光照社崔
家以德星名堂顏優溫盛並萃一門龍子釋奴競名當代
世業青箱之學羣從烏衣之游此足樂者又一也室有
賜研門無雜賓頤情典墳游思竹素羣經或作輯元朗之
釋文古壁所存采祭酒之解字露鈔雪纂柳緝蒲編輯韓集
尊自歐陽祕文定於中壘抗今希古物疏道親此足樂者

又一也操修圭潔敦履璞沈終始夸涂出入康遇玩高柔
之賢儼若將終焉符商瞿之多男早又過之教遺一經傾
蓋篋而何憾生名百藥及艾歲而轉康此足樂者又一也
凡此數者多天倫之懿美匪人世之猥榮吾邨已爲美談
名教之所極樂若夫榮悴不常淹速異致則孟堅賓戲子
雲客嘲皇甫釋勸之論夏侯抵疑之作足下當自得之無
煩僕之瑣瑣者矣至夫僕與足下通名鼎角之時訂交杵
臼之際竹馬旣弃插地久已成林土牛本遲索駕不如一
蹴所幸者賃屋人海十年望衡看花長安三月聯轡半篇
分韻黃鐘鐸鳴一義析疑蕤賓鐵躍而且叙之蘭茝申以

薦蘿幾幾乎猨無離駢之心螽有從螯之性矣君既知命
僕踰彊仕箸述資于仰屋行藏決於倚樓佗日者叢桂相
招徑蘿無恙各有敝廬以芑風雨仍謀薄田稍給饘粥溪
鱗可數聊垂一竿山雌已肥不假再穀黎粟通於餽問裙
屐傳爲畫圖相思而命駕無煩清談而鱖蘇不變則夫青
山依舊白首如新僕豈不能曠引嵇情精研樂旨而爲足
下更進一觴也乎

馬丈補堂暨姚太宜人八十壽序

往者承珙唱第南宮斟書東觀游神山而希古從人海而
測交則有同譜馬君元伯氣鬱青霞棱生紫電牛毛績學
磨角養成既合契於苔岑遂賞奇於竹素則見要聞五際
治識六情折角能談解頤善說騰芳光價條綜乎四家擢
秀騁轡鼎穿乎羣籍每與商榷疑義發揮舊聞戈無入室
之操轍有出門之合既而發彼篋衍示我楹書因得讀其
尊甫器之先生左傳補注三桓七穆悉數能終起廢箴育
無癥不洞乃知一經家法兩世師承如少賴之授仲師中
壘之傳子駿焉而元伯則以爲此皆其大父母補堂先生

及姚太宜人教也蓋先生幼而夙敏長卽通方曾趨東
郡之庭不曳西華之帔倦游司馬有筆陵雲豪氣元龍使
人臥地往往收窮廣柳振乏翳桑胸中之屢萬間身外之
裘千丈雖義漿易竭仁粟無償上腴之田已質其十雙下
澤之車惟餘其一兩而先生胸情泊若神宇泰然好修紉
其佩蘭爲善比于采菽所以覓雞有誓指虞寄以不欺牯
牯來攘恐彥考之見識矣姚太宜人冑承右族兄是左思
家在大雷問訊參軍之使庭飛密雪歡陪太傅之陰用是
女誠七篇姑恩一曲青琴在御白首相莊其與先生可謂
裁一袂之服食並根之禾桓鮑協其業風梁孟符乎隱操

者也至其劬躬並劬黷後益隆門庭肅謹生男勝齊魯之
儒官禮嫻通有母著宣成之號泊乎元伯扶牀伊始繞膝
而前蘭茁其芽槐爲之樹卽更慈襟春盎義訓川流小同
禮堂之傳大母含飴之教故能嗣聲絳帳表異白眉鵷步
上乎金梯蜚英噪于水部延年勤職將邀賜秩之榮伯庠
勵精更無虛張之繕而以靡盬興懷聿修在念孫桐茂豫
復增猗難之枝祖竹清森遙寄平安之信序屬三秋慶先
八袂禮宜製錦雅囑添籌猶憶歲在上章時維中夏承珙
偶持使節代致書郵經通德之門式高陽之里值龐公上
冢之行闕子敬登堂之拜然而心儀有素耳熟能詳將進

祝于岡陵竊比附于風雅夫蓼彼之澤自葉流根詒厥之
謀以孫翼子凍醪介壽占喜色于豪眉螫戶明和聽飛聲
于舜羽所由天錫符策人號寶田阿翁卜以興宗王母受
其介福故繩其善武是宜稱瑟若之觴而被我清芬敢弗
效穆如之頌也哉

同年徐詠之母李宜入六十壽序

今夫桃李美春不少接枝之類松柏多蔭豈無殖草之心
况二月鬻羔夏正紀其善養七日化臚周篇詠其式穀伊
昔鄧嗣率教著東觀之書伏恭事親傳北州之學士安勵
志誦三徙以成仁翔仲甘貧對一餐而在念莫非因心鞠
養繼體扶疏拊育過于所生督責成其有見慈孝之道備
矣顯揚之報宜焉同年徐詠之嗣母李宜入鳩舒望族龍
眠世家惠問川流芳猷蘭馥柳絮飛輕仿出白描之本茗
柯香細吟成綠淨之天其歸於璧壚贈公也魚軒僂乘鳩
杖重闢衛女有五可之傅石氏爲九族所重蘋賓藻澡謹

昨階饋食之儀齊醴秦滫嫫儒門事親之則其家則籬根
共井院落同庖裴寬擊鼓而會餐陳崇建堂而立教立人
於是澤火無睽蒞蘭交贊謝家羣從無封胡羯末之殊王
氏一門乘東海京陵之式當璧墀先生之在日也道腴自
飫宦味無貪怡志東臯命疇南畝露初星晚符周朗之言
落葉新花適陸瑜之志立人則粒食並根芝采同本棲貧
薄笨甯辭瘁於鹿車執爨屢屢猶相莊於鴻案此所以蒙
山卻聘必資戴舂之賢冀野如賓實感提筐之敬也爾乃
門無異烟衣無常主豫章深猶子之恩常山免無兒之憾
則有安世小男襲陽都之爵武侯適嗣易伯松之稱我詠

之同年三歲貌孤一枝寄活惟賴宐人桑螟善負藿蠋相
孚咽苦吐甘分肌損氣瘞攘羊而示義禁探穀以明仁饗
宗成室賦綠衣之卒章具饌畱賓識黃裳於末座以故講
經奪戴憑之席射策占卻詵之枝璧府曾居振鄴侯之仙
骨金梯更上稱何遜之詩才

扇影爐烟爵稜在望

黃麻丹綽豹直常勤而以騅飛集杞將母未遑鯉膳馨蘭
築堂可養於是扶輿長風之夾掛帆大雷之岸愛日南至
慈雲北來宐人方且勗以善養勉其潔修孟博大名覬齊
於李杜眞長令德羞比於范袁此則德音孔昭佳氣時喜

立乎增輝畫雉食報允熊堂開畫錦之榮室延春暉之永
者矣今者素蟾圓後青鳥來初開少廣之筵隱養和之几
宜人則含飴繞膝練色引頤蕭灑林下之風晶明華頂之
宿耳目聰明繫乎神明闐闐肅肅表此禮則承珙幸與添
籌敢辭搢管惟是石磨天上有慚孝穆之文庶幾朱鳥牕
前竊效曼倩之拜爾

同年謝駿生母蔣宜人六十壽序

懿夫少華助維嶽之高寶蓮不落幼海具大瀛之量瑤島
恆春故惟星稠詠肅月袂占良清邱盟而孟氏方興江汜
歌而周人以化方筐圓筥偏推季女之齊三翟六珈丛受
王母之福未有非莊姝表度婉嫕宅心而能錫祉百齡均
禧三族者也同年謝駿生母蔣宜人汝南舊望於越名門
青溪著第三之稱紅閨少下九之戲浣紗蹟古每效援莎
采葛謠新尤工組織千花競笑閒乘鏡水之舟十攄成圖
盡學嵇山之黛固已克嫺彤管無忝素風矣其歸我年丈
鶴岑先生也卜姓吹簫占爻得鼎吉人爲姑而子孫必蕃

祥女入門則婢媼皆慶於時庭護樹背寸草抽心念戴白
之須扶恨空青之莫覓立人乃蒸梨必熟剝棗維新敲半
夜之棋無妨隔戶哺陵晨之乳早已升堂殆所謂愛敬天
情言容典禮者與泊乎鶴岑先生孝廉船歇博士門高陳
馬帳之經振鱣堂之鐸春風得句飛蝴蝶于階前夜月閉
門走鼃鼃于徑裏立人相與料量錢布剗剔蓬蒿舉案而
首藉盤高進饋而芙蓉饌淨一官著腳依然黃卷青鐙半
世同心相對白鹽赤米旣而陶彭澤歸去題辭孫興公遂
初作賦則乃荷衣手製螯白躬操如通德之伴伶元清娛
之隨太史至于田開下瀝代潘岳以扶輿門對中江助姜

詩之汲甕酒錢誰送猶具饌以畱賓官飯無餘存散金而
贍族所爲芳儀播于閭閻惠問宣于里閭者殆數十年如
一日也若夫醕桃作飾畫荻教書鳴機熬五夜之糠煨講
敝半梳之髮故駿生駒齒未齊鳳毛已就昂髻縱壑踏地
騰霄然藜天廩之藏簪筆文螭之陞班冠玉筍燭徹金連
紉鍼畱蜀纈之袍馨膳寄蓬池之鱸行將碧油紅旆迎千
里之安輿

紫詰黃麻賁五花之

寵命乃者呂琯飛灰繡幢添線仰慈雲之遙覆幸愛日之
初長爲璇宮周甲之期是琪樹逢辰之會梅花數點映成

雪髻之光淥水一江剡作霞觴之酒承琪飫聞藻德敢闕
蘭芬望鶴影於天門峰高慈姥達魚緘於日下竈問麻姑
惟願林下風清五嶽著長生之錄江南春近九華明不夜
之天

家虛叁司訓六十壽序

昔者伏波老矣念鄉里之善人陶令歸來悅親戚之情話
吾人憂患厯更馳驅旣倦未嘗不縈情山澤瞻跡釣游維
桑懷夫故都有杖親其同姓况于撫塵之好並坐青山總
角之交倏垂素髮望衡接閭有伏臘之相共東阡西陌惟
穀稼之是咨豈不若淵魚林鳥聚隊爲懽山木井泉長年
自適者乎虛齋學博乃吾宗之長德抑少日之石交也君
幼而憎定長更虛恬醴粹宅心暖姝接物猶憶余方舞勺
君甫勝冠厯左類而櫬旂入東綵而鼓篋士衡作賦之歲
已欲凌雲子長著史之才基於探穴遂相與流連文宴跌

宕琴尊高談娛心勝概超俗道南道北無間于素風上洞
下洞不隔于疏屬屏絲竹之響而趣在蘭亭開桃李之園
而罰依金谷此一時也旣而星離異地雨絕各天余也棲
雞薄笨之車叱馭峻絕之阪萬里適文身之俗三年守窮
髮之區黑水無邊朱顏非昔而君則南柯獨醒北山早移
解體世紛結志區外意行率爾猶是烏衣之游宴處超然
不改青楊之巷此又一時也夫以君之勲錄其躬溺苦于
學設使植根芳苑必當蔽日干霄奮跡康衢抑且追風躡
影然而斧斤仁義羶鎖利名青黃爲蟠木之災鐘鼓非雜
縣之享孰與夫棲神虛白迴志元祺延年芳菊之谿卻老

長松之谷者哉間嘗參叙彝倫商榷名教本天爵之爲貴
綜人世之所難君之可稱厥有其實夫祿不逮養者深風
木之悲游必有方者興雲舍之感君則白華朱萼常在陵
陬秋樹夕葵未離膝下石家建慶傳陵里恭謹之風周氏
顓嵩成汝南方雅之族而且萊妻處室敬通之恨泯焉驥
子候門儒仲之慙不作此君之篤行一也君以廩仕難居
儒官易稱擇卑枝而託足臨清流而濯纓赭圻百里折輦
可杭青氊半牀搜篋故在聚徒卻贊惟橫上舍之經載米
到官但飲中江之水而猶以體疲塵雜性礙曠閒暫陳苜
蓿之盤旋遂芰荷之服此君之高致又一也爰乃標賞風

前寄情霞外梯巖架壑激流植援尋謝公之墩闢蔣生之
徑軒櫺四面都納奇峰烟火一村自名別墅鑿楹則好書
千帙入座而濁酒一壺晨燈夜燭以課後生春莢秋葉以
娛晚歲松風傑閣三層習靜之居菊影疎籬九日登高之
會此君之逸興又一也至夫佳氣時喜和神當春棲遲莫
競之林利涉忘憂之沼良以性靜則情逸慮澹則物輕冰
炭不涉其懷寒暑莫侵其質故上經可以說道中藥可以
養神元龍除豪士之氣卑豹有嬰兒之色此君之善攝又
一也或者謂君嫺慢相成貞孤絕物類御寇之連牆不謁
似子綦之隱几若忘者余則謂士各有志人不自知故太

邱道廣元禮門高事無兩兼理則一是徐公率通介之性
故自有常懷仁處季孟之間去其太甚斯可矣今者禮合
杖鄉義推先飯凡屬同席共研之契各懷筭餌卮酒之歡
而余亦得以蒲柳衰年枌榆舊好漫效介眉之祝以當撫
掌之資豈曰誦穆如風聊壹笑以爲樂庶幾交澹若水可
久要之不忘爾

游萬柳堂記

今將誌陸海之滄桑問故家之喬木則夫河陽別館好時
閒園綠塢青瑣之華弋林釣渚之翫莫不物換景移光沈
蕪歇然而梓澤邱墟音塵未沫平泉已矣花木如存豈非
名流雅集來者重其履綦主人好賢曠代深其佩結乎萬
柳堂者故益都相國別業康熙間嘗招鴻博諸君子觴詠
于此者也在水一方去天尺五蓮池放棹花嶼移牀翮飛
絮而擘箋拘碧筩而遞盞其已事矣旣而火城不返沙路
旋平奉誠之主旣遷王珣之宅遂捨

堂後歸倉場侍郎石
公文柱始改爲拈花

寺

樹猶如此興條爲之泫然池又已平倒載歸于何處過

之者輒有甘棠愛樹之思峴首沈碑之慕焉今者寺尚拈
花人思補柳

時朱堃雲處士補種柳五百株

草色迷舊烟痕逗新遂以壬

申二月晦日偕同人游焉至則女牆覆雲僧房閉日古佛
欲臥面餘網塵啞鐘不縣腹飽苔繡其東則

御書樓也奎章炳若靈光巋然相與綠桃而登凭檻而望
戶外修竹翩隨裏翻城頭好山忽與眉接于時野氣勃發
林芳轉清山桃小紅沙荻短翠新植之桺含青濛濛就殘
之花綴白點點乃復越斷澗驀層坡藉草成茵蔭柏作蓋
勝槩追古遙情抒今求所謂橋橫並馬磯疆打魚者已難
得其仿佛

朱竹垞萬柳堂詩云每妨並馬橫橋渡杭堇浦詩云溪風掠過打魚磯

無怪乎野

雲之墅清露之堂地已傳疑景徒見畫也已

元廉希憲號
望雲有園名

萬柳堂帝京景物略云在右安門外日下舊聞謂在城東南隅則卽指今處矣阮芸臺開學云曾見趙松雪畫卷卽右丞張筵招飲命劉姬持花獻酒歌驟雨打新荷曲事也

危樓再升疏酌更舉觀東臯

之春事延西崦之夕陽蔬香半畝闌入酒尊農譟數聲妍
勝菱唱曲水淺淺風來自波高柯亭亭烟脫忽暝然後旋
軫弭轡雲散而歸將以此導襍飲之先路躡羣屐之後塵
焉同游者朱蘭坡編修蘭臯雪邨兩孝廉立亭秀才家鶴
書國學也

大通橋汎舟記

炎陽有亢鬱居無俚端憂託於凝塵相思繫於烟水急欲
命疇嘯侶戲廣浮深追良會於漳渠覓賞心於濠濮納彼
清曠滌此煩歎爰與同人有大通橋汎舟之約而以萍號
不興飛廉作虐南風苦競西日難遮意忽忽不果也俄而
甘澍驟熾氣洗潤液流夜清景麗朝將申前盟展勝踐芳
訊乍往佳招適來遂同命駕出乎城闔舟小於瓜篷輕似
槎坐來天上行入鏡中惟見細藻一川新蒲兩岸水葉初
放碧到鷗邊林花晚開紅出燕外魚簷隱隱時聞跳珠鴨
闌疏疏皓若堆雪于時高樹翳雲幽草泣露嫩涼浮席餘

爽在衿乃命羞蘭肴倒桂醕甘果繼進苦茗錯陳航船一
棹恣其拍浮篙槳不施澹乎容與風來嫋嫋波生鱗鱗兼
葭未蒼已作秋響楊柳盡靡都隨岸移談謔紛然倏抵開
口隄長接天橋低臥水急懸流之漱石驚飛沫之濺衣乃
復易舟而前洗盞更酌如上洄下洄之源成前溪後溪之
游川涂較長烟景愈美齊麥半頃近水不枯茅茨數間臨
流便韻殊令人懷江湖泛宅之思動蓑笠隨身之興焉夫
有定者地也而難得者時也此間披襟暢褰觸目延賞然
使冰漸結岸則寒威中人租船塞河則器聲聒耳惟宜早
夏尤勝晚秋而况風際懷清雨餘送朗水蘸輕衫之碧塵

消輓路之紅豈非事與願諧良隨美具者乎林蔭屢移權
歌旋返清暉畱客蒲稗可以因依夕陽滿川蜻蛉爲之前
導視昨者釣魚臺之游據石而坐僅足垂綸沿溪而行無
從買舫者不已較勝十倍乎於是朱蘭坡編修有詩予復
濡筆記之以無忘歲月時嘉慶癸酉四月廿有一日也同
游者朱伯仁茂才蘭皋孝廉立亭縣尉暨蘭坡幼子五郎
凡六人

疊嶂樓記

夫羣山所宮靈秀斯萃攬勝之要高明是宜吾鄉疊嶂名樓畱雲字閣所繇來矣余自汎渤澥經溟渤窮烟濤之微茫隨日月以出溲策六鼇於崇島望一髮於中原萬間之志未償一壑之戀斯在泊乎歸身天際策杖山中瞻睨睨之烟村撫依依之楊柳苟可以暉曠高明藻澈神志則泰山之與秋豪滄海之於一勺其致一也屬吾宗之多美適茲樓之落成咫尺便於近登臨眺竄于暇日平揖列巘頻臨迴谿無仲宣懷土之悲有淵明望衡之景其斯爲游目有涯賞心無歇者與乃爲銘曰

青山拓屏綠樹編町朝霏夕靄環我邨境橫梁跨溪高閣
枕嶺牕明黛染檐峭雲飛春羽振響秋蟾納輝攜烟入裊
拂星滿衣一川鏡激萬瓦鱗積風泉虛籟林嵐微羃耳目
極清高下一碧簾旌雨暗軒檻姓開鮫歸接席農唱停杯
抱琴有意行藥還來

丁亥八月十六日夜丹谿水閣翫月記

余以中年多故秋士易悲念陳王之端憂思枚叔之發疾將以八月之望謀爲一夕之歡已約同人成其近局適疊峰主人卜期折簡選勝移尊就水閣之再成攬烟村于五里于時晴暉晃野新涼襲衿白雲自媚碧草未歇離橋十步已聞灘聲遶欄一周陡落山翠乃相與緣桃而登啟牖而望其南則巨石枕岸有如伏鼇北則叢柯被山時見歸鳥東則充岫屏列烟雲之所出沒也西則沙路砥平樵牧之所往來也爾乃邱壑具胸薜蘿在眼逸興互發高談轉清杯舉旣陳各隨其斟酌舄履交錯相忘于主賓俄焉月

出嶺表風來檐隙窓櫺四面隨風闔開水光一樓與月上
下鈴語振響梵唄起而相磨佛燈熒然琉璃爲之無色此
則高會不必其登堂清游無假于秉燭者也良夜方永疎
客始闌白露賸空清流見底歸路之近初不隔于牛鳴橫
江之游庶猶徵于鶴夢夫吾儕瓜紹衍派粉榆介居壑畛
剿斄以爲生燔枯折芟以爲禮情味相洽比鄰之鵲鴨無
猜動息皆知連巷之棗梨可數而且謝家羣從竝以文義
相先韋公族人自爲曠逸之友亦足樂矣然而三年之中
霧姓已變斗酒之會合散不常猶憶昔在雞年同瞻兔魄
而今則一抱秦關之櫺一鼓湘江之棹矣

謂乙酉秋仲與
兼山玉鑑翥雲

暨從子國樑從孫炳光同飲于此
今兼山赴官陝西炳光薄游湖南
載涂浮雲無披豁之期高閣有寂寥之感焉然則深杯入手能無懷舊之情園景當頭可忘及時之樂乎于是主人索詩同輩有作宿酒既醒泚筆記之

乙丑同年公祭英太師母經太夫人文

元冥殷節颺厲霜飛璇宮罷織呂琯沉灰瞻言懿渠疇云
不悲有禕慈儀燕垂秀毓秉禮婉孌應圖令淑維我文莊
儲于吉卜衣翟在室杖鳩在堂承巾奉帚惟克翊襄放于
饋祀既饗且明高門鼎貴華族林茂戚備椒塗嫺連庭胃
筐篚餉遺歲時輻湊經畫有緒縟而不煩言容罔失典禮
克甄筮助之美用無間然文莊隆隆優賢敷厯輶駟從宦
沃盥侍側職稱立家功參報國女君弃帷疏衰終禮尙書
耆年如几杖倚待漏薰衣聞聲識履治內旣輯燾後益隆
篤生顯嗣實推司農訓厲畫荻愛存折筭白雉告祥黃鵠

匪憂惟勤杼機以勛堂構愛日冬暄慈雲春覆司農弱冠
鬱然奮興增城峻上亨達載騁韋平烏奕桓武繼仍高堂
燕喜載色載笑豈惟色笑曾是用教

國恩努任家聲劬紹霖雨澤物皇華戒涂勉以靡盬毋懷
于家視爾報稱以爲我娛侍直承明蕃遮錫賚陸橘褒香
穎羹器擬歸奉蕙闌斂衽而拜昔榮替月今貴成風金章
旣被石窳斯封鸞牋迴紫鳳綬銜紅履盛恩冲席豐畏滿
錦被反覆弋綈婁澣循法蘋筐習勤柘館東海之則京陵
之規起居八座連慶九閨寶爻遞衍悅佩嗣徽祖竹長青
孫桐更綠三葉重光瀛洲繼躅繞膝含飴王母介福耳目

聰明神明不衰何期青鳥一旦飛來難求玉瀝遽赴銀臺
畫簷宵掩靈輻發相輟鄰春哀均朝列莫賸陳詞揚芬
靡歇

同鄉公祭汪馨廷先生文

嗚呼歛寒谷之鄒律兮羣煦姬乎陽春甄元模而戴義兮
扇和颺而詠仁樹桃李之美蔭兮佩芝蘭之芳薰朝驂乘
于夏縵兮夕將接乎錦茵胡昊穹之不弔兮慘倏萎乎詰
人惟先生之蘊真兮輝斗南而毓秀植蟠木之發骹磊砢
兮鍊風霜而克就晚濯髮于天池兮履雲衢而載驟歷延
閣廣內之清祕兮春華摘而秋實茂終典綍於

黃扉兮班行躋乎三壽進砥節以首公兮退汲汲而匪私
之營惟翹慙于氣類兮雖疲勩倦矧而周旋一出于至誠
不飾兒以干譽兮不絕物以爲貞物各得其欲以去兮淵

懷固無所設其重輕誦敬恭于桑梓兮尤來者之典型彼
江湖之無餘潤兮曾溝渠之不如松柏之下無殖草兮又
何異乎枋榆甘齷齪而保已兮委同舟于越胡羌獨明于
利害兮曰予智而人愚究大化之同盡兮不見華屋之變
爲邱墟緬潭粹之遺規兮障迴瀾于頽俗內纏絲以抱悃
兮外神禪而非褻輸肝膽而與人兮日孜孜如不足所貴
乎解燒而釋紛兮能使鄙夫寬而薄夫篤旣遺榮而止足
兮乃引年而乞身方東都之祖帳兮值鄉飲而爲遵龍蛇
忽其告厄兮閤宿曜于蒼闥感履綦之遂脊兮猶歛和其
若醕均懽悽于疏戚兮輟脊相于比鄰歸而可祭于社兮

實純終而領聞抒哀袞而奠醑兮庶來格兮來歆

辛酉同年祭馨廷先生文

維公紫宿降靈白嶽挺生斧藻其德禕隋其行觴典謨以
斟酌雜藝術之璜珩握靈蛇之璫寶垂雕龍之俊聲惟輪
囷之蟠木資獲匠乎晚成辭山蹻之奧渫逮艾歲而峭嶸
夜然藜於東觀晝視草於西清花磚係直棘院分衡照春
坊之寶字采秋實于家丞荷

金鑾之

渥寵樹玉署之芳型佐洪鈞于台鉉兼華秩於清卿迴鵠
亨衢羽儀

上京表漢廷之魁壘齊雒社之耆英若夫接人用榘輔躬

以榮匪突梯以從俗毋傲訐以近名泯物我於畦畛徹表裏之府城道於太邱之廣鑒含巨源之精至其竭思罔罔行義觥觥巍然興德崔乎至誠被珍裘之千丈覆廣廈之萬甍從代公而啟護詣李建而釋爭一鐘之餽不責償于鄭罕三族之鄙皆待食於晏嬰宐其秉陽施而長世積陰德而餘慶者也適之樂聖疏傳遺榮策靈壽之梏杖結逍遙之組纓方將青門祖帳綠野觀耜製九秋之芟服調千里之蓴羹曝背話觚棱之舊扶肩望衡宇之迎而乃傳箕歸次殷奠在楹蒼龍之杓指寅維而乍轉白雞之光應酉歲而旋驚从春爲之輟相樞騎於以哀鳴雲慘慘兮覆幕

風蕭蕭兮撼櫺某等習瞻顰粹夙荷題評思登龍以承宴
倏驂虬而上征感梁木而冀涕望總帷而愴情絮魯酒以
嗽詞庶靈鑒兮式憑

都察院公祭魯敬亭封翁文

於庠封翁人貌而天操冠秋雲神棲九元少而夙敏賓賓
學子攻苦食啖投筆而起仰瞻伯兄顧于弱弟並持槩鉛
誰營甘旨產薄指繇誰殖誰理爰及仲舅同隱于市姁姁
以游溪盎不苛販夫豎子偕飲其酥勤恁旅力以充厥家
粹于色養兄弟匪他雖雖一門其樂若何季也不天在原
斯急熒熒藐孤撫以成立予之能仕父教之忠詰嗣升朝
隱隱隆隆簪橐祕省遷于南臺迎養不許郵筒迭來曰維
御史耳目之官言貴可行毋易于言六察之外職多兼攝
行行爾驄比于知雜位不可失官不必侵勗爾勤慎以慰

馬骨三
卷二
我心喆嗣奉之罔敢失墜望望竭思允日資事退食之暇
思省于鄉翁復不許戒毋怠遑以志養志眎閩歐陽鄉人
來者僉云壽康好行其德令聞令望鄉有爭言除苛解嬈
丁歲之瘠謀賑勸糶收族以謹敬宗于廟修廢舉頽不懈
益劭襄誠衆善宜其大年何報之爽而忽不延商飈始飛
承間千里喆嗣拊心几筵如在凡我執事同官爲僚輟春
均感敬陳牲牢奠以展誠靈鑒孔昭尚饗

祈雨龍神廟文

維道光二年三月丙午朔越祭日辛未福建臺灣兵備道
胡承珙臺灣鎮總兵官觀喜等謹以清酌庶羞之奠致祭
于

龍神之靈曰惟神尺木不階寸膚斯合角尾東方之宿德
在好生黍苗南國之膏職司布澤粵自元冬潛閤久踰啟
蟄之期迨茲青律發生正值服犁之候星言旣戒霓望方
殷傾鹄埵以無聞臨嶼淵而未躍昨致牲醪之敬爰申圭
璧之祈而乃箕哆頻張萍號未起雖暫霑於霽霖猶勤佇
於滂沱故知載渴之懷非一勺所能潤尚幸已降之令或

再出而無難伏望鑒此愚誠恕其瀆告鱗堂貝闕應鳴鼓
而有聞金支翠旗紛隨驂而莅止大布霖三之惠稍迴異
二之威青疇渙其流泉亦嵌鬱爲樂土日雨而雨羣占比
缶之孚若烟非烟敢忘升香之報尚饗

祭城隍神求雨

維年月日臺灣兵備道胡承琪等謹用清酌庶羞致祭于
城隍神之靈曰惟爾有神共茲守土雖幽涂之隔闕實明
德之馨香環以大瀛潤宐過于九里越有小旱望正切於
三農乃者鞭石無徵揚沙屢告苗淹淹而待槁泉涓涓而
斷流忍看坼龜之文莫聽枯魚之泣曩雖循于禳祝曾未
荷乎鑒觀雲族之興蓊然雨師之灑微爾是用誠修潔埤
志迫納隍載申嘉栗之歆不勝發棠之願伏乞騰章閭闔
移檄山川婆娑之洋舞靈潮而上潤毗舍之國布甘露以
旁施歲乃有秋民亦無恙庶念肌侵之痛丕昭血食之靈

尚饗

中是堂駢體文卷二終